

Tarikh Dibaca: 31 MAC 2017

KHUTBAH JUMAAT

Tajuk:

“MAWADDAH, RAHMAH DAN SAKINAH”

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR



SENARAI AHLI JAWATANKUASA KHUTBAH NEGERI SELANGOR 2017

- 1. SS. Dato' Haji Haris Bin Kasim (Pengerusi)**
Pengarah Jabatan Agama Islam Selangor
- 2. SS. Dr. Haji Anhar Bin Haji Opir (Ahli)**
Timbalan Mufti, Jabatan Mufti Negeri Selangor
- 3. Tuan Haji Idris Bin Ramli (Setiausaha)**
Ketua Penolong Pengarah, Bahagian Pengurusan Masjid, JAIS
- 4. Yg. Berbahagia Dr. Haji Osman Bin Haji Sabran (Ahli)**
Pensyarah, Universiti Selangor
- 5. Dato' Haji Abdul Majid Bin Omar (Ahli)**
Ahli Jawatankuasa Fatwa Negeri Selangor
- 6. Tuan Haji Hamid Bin Md Isa (Ahli)**
Pensyarah, Kolej Universiti Islam Selangor
- 7. Tuan Haji Md. Sahari Bin Abdullullah (Ahli)**
Ahli Jawatankuasa Fatwa Negeri Selangor
- 8. Tuan Haji Abdul Halem Hapiz Bin Salihin (Ahli)**
Ketua Penolong Mufti (Fatwa), Jabatan Mufti Negeri Selangor
- 9. Ustaz Muhammad Farhan Bin Wijaya (Ahli)**
Imam Besar Masjid Sultan Salahuddin Abdul Aziz Shah
- 10. Ustaz Indera Shahril Bin Mohd Shahid (Ahli)**
Pegawai Majlis Agama Islam Selangor
- 11. Ustaz Hairol Azmi Bin Khairudin (Urusetia)**
Penolong Pengarah Unit Khutbah, BPM, JAIS



“MAWADDAH, RAHMAH DAN SAKINAH”

الْحَمْدُ لِلَّهِ الْقَائِلِ: وَمِنْ ءَايَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا لِتَسْكُنُوا إِلَيْهَا وَجَعَلَ بَيْنَكُمْ مَوَدَّةً وَرَحْمَةً إِنَّ فِي ذَلِكَ لَآيَاتٍ لِقَوْمٍ يَتَفَكَّرُونَ^١

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dirahmati Allah sekalian,

Saya menyeru agar kita bersama-sama meningkatkan ketakwaan kepada Allah SWT dengan melaksanakan segala perintah-Nya dan meninggalkan segala larangan-Nya. Marilah kita memperbanyakkan zikir kepada Allah SWT dan selawat serta salam keatas junjungan besar Nabi Muhammad SAW disamping sentiasa berusaha melaksanakan segala

¹ Ar-Ruum ; 21



sunnahnya. Mudah-mudahan ianya akan memberikan manfaat kepada kita di dunia dan di akhirat.

Pada kesempatan hari yang mulia ini, khatib mengajak sidang Jumaat sekalian untuk menghayati khutbah yang bertajuk **"MAWADDAH, RAHMAH DAN SAKINAH"**. Mudah-mudahan ianya mampu menjadi hala tuju pembentukan keluarga bahagia agar selari dengan tuntutan syarak.

Hadirin yang dikasihi Allah sekalian,

Perkahwinan disyariatkan sebagai satu cara meramaikan umat manusia, membentuk keluarga bahagia, menghubungkan silaturahim, memelihara keturunan dan merupakan satu sunnah yang dituntut oleh Islam.

Melalui surah ar Rum ayat 21 yang dibacakan di awal mukadimah khutbah tadi menjelaskan bahawa Allah SWT telah menjadikan hikmah perkahwinan sebagai satu jalan untuk pasangan suami isteri mewujudkan kasih sayang (Mawaddah) dan saling cinta-mencintai (Rahmah) antara satu sama lain. Kasih sayang yang terjalin dari hubungan perkahwinan yang sah itu akhirnya akan membuat kita berfikir tentang kebesaran Allah SWT. Penghujungnya akan lahir ketenangan (Sakinah) dalam rumahtangga, sejahtera dalam masyarakat dan harmoni dalam sebuah negara.

Muslimin yang berbahagia,

Islam telah menggariskan ciri-ciri bakal suami dan isteri yang perlu diteliti ketika memilih pasangan hidup. Bakal suami yang perlu diberi perhatian ialah seorang yang menghayati agama, memiliki akhlak mulia dan mampu memimpin dan membimbing keluarga. Hadis daripada Abu Hurairah R.Anhu bahawa Rasulullah SAW bersabda;



إِذَا خَطَبَ إِلَيْكُمْ مَنْ تَرْضَوْنَ دِينَهُ وَخُلُقَهُ
فَزَوِّجُوهُ إِلَّا تَفْعَلُوا تَكُنْ فِتْنَةٌ فِي الْأَرْضِ وَفَسَادٌ
عَرِضٌ.

"Apabila datang meminang kepada kamu orang yang kamu redha agama dan akhlaknya, maka hendaklah kamu kahwini akan dia, jika kamu tidak melakukannya nescaya akan berlaku fitnah di atas muka bumi dan kerosakan yang besar".

(Riwayat At-Tirmizi).

Begitu juga ciri-ciri bakal isteri yang menjadi pilihan hendaklah dari kalangan seorang yang beragama sepertimana hadis daripada Abu Hurairah R.Anhu bahawa Rasulullah SAW bersabda;

تُنْكَحُ الْمَرْأَةُ لِأَرْبَعٍ لِمَالِهَا وَلِحَسَبِهَا وَلِجَمَالِهَا
وَلِدِينِهَا فَاطْفَرْ بِذَاتِ الدِّينِ تَرِبْتُ يَدَاكَ.

"Lazimnya wanita dikahwini kerana 4 perkara, hartanya, keturunannya, kecantikannya dan agamanya. Oleh itu pilihlah yang beragama nescaya kamu akan beruntung".

(Riwayat Bukhari dan Muslim)

Muslimin yang dirahmati Allah sekalian,

Mawaddah hanya terjelma di alam perkahwinan apabila suami isteri saling memahami tugas dan tanggungjawab masing-masing. Apabila telah dijab qabul, maka termeterai tanggungjawab seorang suami memberi nafkah zahir dan batin terhadap isteri. Menyediakan keperluan asas sebaik mungkin



yang meliputi makanan yang mencukupi, pakaian mengikut keperluan dan tempat tinggal yang selesa, selaras dengan kemampuan suami.

Sebuah hadis daripada Muawiyah R.Anhu bahawa Rasulullah SAW ditanya tentang hak seorang isteri ke atas suaminya, maka Nabi SAW menjelaskannya bahawa seorang suami hendaklah memberi makanan dan pakaian kepada isterinya dan tidak memukul di wajahnya, tidak menghina dan tidak meninggalkannya melainkan di rumah tempat kediamannya.

Isteri pula perlu tunduk dan patuh kepada perintah suami selagi tidak melanggar perintah syarak. Rasulullah SAW bersabda yang bermaksud;

"Hak seorang suami ke atas isterinya ialah isteri tidak meninggalkan tempat tidur suaminya, rela dengan gilirannya yang ditetapkan oleh suaminya, taat pada perintah suami, tidak keluar rumah tanpa izin suami dan tidak membenarkan orang yang dibenci suami masuk ke dalam rumah".

(Hadis riwayat At Tabrani).

Muslimin yang dirahmati Allah,

Dalam membina rumahtangga bahagia yang mendapat keredhaan Allah mestilah memiliki sifat Rahmah atau kasih mengasihi antara satu sama lain. Sikap bertolak ansur, memahami antara satu sama lain, berlaku adil dan ihsan merupakan antara ciri sifat rahmah yang perlu ada dalam sesebuah rumahtangga.

Kebahagiaan rumahtangga juga adalah kerana faktor dapat menguasai komunikasi yang berkesan.

Perlu diketahui juga bahawa bahasa komunikasi bukan hanya melalui bahasa pertuturan (lisan) tetapi juga bahasa badan atau bahasa perantaraan melalui telefon dan lain-lain. Suami juga perlu memelihara percakapan ketika



bersama isteri kerana biasanya isteri mudah mengingati perkataan yang diucapkan oleh suami. Jika perkataan itu kasar tentu akan memedihkan hatinya yang tidak mustahil menjadi barah hingga melahirkan dendam kesumat isteri terhadap suaminya.

Firman Allah SWT dalam surah an-Nisa ayat 19;

... وَعَاشِرُوهُنَّ بِالْمَعْرُوفِ ...

"... Dan bergaullah kamu dengan mereka (isteri-isteri kamu itu) dengan cara yang baik..."

Para muslimin yang dikasihi Allah,

Apabila sifat mawaddah dan rahmah berjaya dibina dan terbentuk dalam sebuah keluarga, maka akan lahir Sakinah(ketenangan) bukan sahaja kepada pasangan suami isteri tetapi juga rumahtangga yang dibina. Suami akan melakukan tugas dengan ikhlas, jujur dan amanah. Manakala isteri pula sentiasa bekerjasama, hormat menghormati dan bertimbang rasa dalam pergaulan. Maka lahir suami isteri cemerlang yang membina mahligai rumahtangga dalam rahmat dan naungan Allah. Rumahtangga yang tenang dipenuhi dengan amalan agama seperti berdoa, berzikir, membaca Al Quran, solat berjemaah, majlis ilmu, makan minum bersama dan seumpamanya.

Ketenangan yang terpancar dalam sesebuah rumahtangga mempunyai kesan yang cukup besar dalam masyarakat. Ini adalah kerana keluarga merupakan sebuah negara kecil yang ditadbir oleh suami. Keharmonian yang terjelma akan melahirkan perpaduan dan keamanan dalam sebuah masyarakat. Masyarakat yang sejahtera dan hidup aman damai akan



melahirkan pula negara yang rukun damai dan sunyi dari perpecahan dan kacau bilau. Perhatikanlah bagaimana faktor mawaddah, rahmah dan sakinah memainkan peranan yang besar ke atas pembentukan sebuah negara yang harmoni dan aman damai.

Justeru dalam memastikan setiap rumahtangga yang dibina kekal hingga akhir hayat, maka setiap individu yang telah berkahwin perlu memiliki ilmu pengetahuan yang mantap, amalan yang soleh, ekonomi yang stabil lagi halal, kesihatan yang baik dan hidup berpandukan kepada contoh amalan kehidupan Rasulullah SAW.

Muslimin yang dirahmati Allah,

Sesungguhnya mewujudkan keluarga mawaddah, rahmah dan sakinah adalah merupakan satu tuntutan Islam. Ia adalah cita-cita setiap pasangan untuk melahirkan keluarga yang aman, bahagia dan harmoni sesuai dengan slogan Baiti Jannati atau Rumahku Syurgaku. Akhirnya marilah kita menghayati kesimpulan dari khutbah hari ini iaitu:

1. Umat Islam hendaklah ingat bahawa Allah mensyariatkan perkahwinan ke atas hamba-Nya sebagai suatu ibadah dan ia wajib dibina dengan penuh mawaddah, rahmah dan sakinah.
2. Umat Islam wajib membina kerukunan rumahtangga dengan berkasih sayang, saling bekerjasama, hormat menghormati, berkomunikasi dengan lembut dan mesra bagi memikul hak dan amanah yang diberikan Allah kepada setiap pasangan.
3. Setiap pasangan hendaklah menjauhi perkara-perkara yang boleh meruntuhkan rumahtangga seperti menyebarkan hal-hal keaiban rumahtangga.



4. Umat Islam hendaklah berpegang kepada matlamat perkahwinan untuk mendapatkan keredhaan Allah, supaya dapat melahirkan zuriat yang menyejukkan mata semua orang.

أَعُوذُ بِاللَّهِ مِنَ الشَّيْطَانِ الرَّجِيمِ
وَالَّذِينَ يَقُولُونَ رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا
قُرَّةَ أَعْيُنٍ وَاجْعَلْنَا لِلْمُتَّقِينَ إِمَامًا ﴿٧٤﴾

"Dan juga mereka (yang diredhai Allah itu ialah orang-orang) yang berdoa dengan berkata: "wahai Tuhan kami, berilah kami beroleh dari isteri-isteri dan zuriat keturunan kami perkara-perkara yang menyukakan hati melihatnya, dan jadikanlah kami imam ikutan bagi orang-orang yang (mahu) bertakwa".

(Al-Furqan : 74).

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي
وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلْ
مَنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ.
أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ
وَلِسَائِرِ الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.



KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ
لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ
وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. أَمَّا
بَعْدُ، فَيَا عِبَادَ اللَّهِ، اتَّقُوا اللَّهَ، أُوصِيكُمْ وَإِيَّايَ
بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah SWT,

Mimbar Jumaat sekali lagi berpesan supaya kita sentiasa bertakwa kepada Allah SWT dan menyedari bahawa Islam mengajar kita supaya bersikap sederhana dalam segala amalan. Kita amatlah dituntut agar menampilkan kemuliaan akhlak, sikap dan keperibadian tinggi kerana Rasulullah SAW diutus untuk menyempurnakan akhlak dan sebagai rahmat bagi seluruh umat dan sekalian alam.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا
صَلُّوا عَلَيْهِ وَسَلِّمُوا تَسْلِيمًا.



اَللّٰهُمَّ صَلِّ وَسَلِّمْ عَلٰى سَيِّدِنَا وَمَوْلَانَا مُحَمَّدٍ سَيِّدِ
الْمُرْسَلِيْنَ وَارْضَ اللّٰهُمَّ عَنْ اَصْحَابِهِ وَقَرَابَتِهِ وَأَزْوَاجِهِ
وَذُرِّيَّاتِهِ أَجْمَعِيْنَ.

اَللّٰهُمَّ اغْفِرْ لِلْمُسْلِمِيْنَ وَالْمُسْلِمَاتِ وَالْمُؤْمِنِيْنَ
وَالْمُؤْمِنَاتِ الْاَحْيَاءِ مِنْهُمْ وَالْاَمْوَاتِ، اِنَّكَ سَمِيعٌ قَرِيبٌ
مُّجِيبُ الدَّعَوَاتِ وَيَا قَاضِيَ الْحَاجَاتِ. اَللّٰهُمَّ اِنَّا
نَسْأَلُكَ وَنَتَوَسَّلُ اِلَيْكَ بِنَبِيِّكَ الْاَمِيْنِ، وَنَسْأَلُكَ
بِاسْمَائِكَ الْحُسْنٰى وَصِفَاتِكَ الْعُظْمٰى اَنْ تَحْفَظَ
بِعَيْنِ عِنَايَتِكَ الرَّبَّانِيَّةَ وَبِحِفْظِ وَقَايَتِكَ الصَّمَدَانِيَّةَ،
جَلَالَةَ مَلِكِنَا الْمُعْظَمِ سُلْطَانَ سَلَاطُوْر، سُلْطَانَ
شَرْفِ الدِّيْنِ اَدْرِيسِ شَاهِ الْحَاجِ ابْنِ الْمَرْحُومِ
سُلْطَانَ صَلَاحِ الدِّيْنِ عَبْدِ الْعَزِيْزِ شَاهِ الْحَاجِ. اَللّٰهُمَّ
اَدِمِ الْعَوْنَ وَالْهِدَايَةَ وَالتَّوْفِيْقَ، وَالصِّحَّةَ وَالسَّلَامَةَ
مِنْكَ، لَوْلِيَّ عَهْدِ سَلَاطُوْر، تَغْكُوْ اَمِيْر شَاهِ ابْنِ
السُّلْطَانَ شَرْفِ الدِّيْنِ اَدْرِيسِ شَاهِ الْحَاجِ فِيْ اَمْنٍ



وَصَلِّحْ وَعَافِيَةٍ بِمَنِّكَ وَكَرَمِكَ يَا ذَا الْجَلَالِ وَالْإِكْرَامِ.
اللَّهُمَّ أَطْلُ عُمْرَهُمَا مُصْلِحِينَ لِلْمُوظَّفِينَ وَالرَّعِيَّةِ
وَالْبِلَادِ، وَبَلِّغْ مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam khususnya negeri Selangor, sebagai negeri yang maju, sejahtera dan berkebakikan dibawah naungan dan pimpinan raja kami sebagai ketua agama Islam di negeri ini.

Justeru kami pohon kehadiran-Mu ya Allah, tetapkanlah iman dan pegangan kami kepada Ahli Sunnah Wal-Jamaah. Peliharalah kami daripada akidah yang menyeleweng dan sesat seperti Syiah, Qadyani serta lain-lain. Kukuhkanlah ya Allah perpaduan kami, luaskanlah rezeki kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, lindungilah kami daripada bala bencana dan wabak penyakit khususnya wabak penyakit ayam H5N1 (H Five N One). Kami pohon ya Allah agar wabak ini tidak merebak ke negeri kami Negeri Selangor Darul Ehsan, Allahumma Amin!

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا حَسَنَةً
وَفِي الْآخِرَةِ حَسَنَةً وَقِنَا عَذَابَ النَّارِ.



عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ
ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٩﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُوا لَهُ عَلَىٰ نِعَمِهِ
يَزِدْكُمْ، وَاسْأَلُوهُ مِنْ فَضْلِهِ يُعْطِيكُمْ وَلَذِكْرُ اللَّهِ
أَكْبَرُ وَاللَّهُ يَعْلَمُ مَا تَصْنَعُونَ.
